

Wulf Wagers wunderliche Weltbetrachtung

Türkdeutsche Flaggomanie

I fend's super, i ben wirklich begeistert: überall aus de Fenschter hängt Fahna, net bloß die deutsche, noi, au von viele andere Nationa. Des fend i wirklich klasse!

Die Krönung aber fend i, wenn Autos sowohl mit dr deutscha, als au mit der türkischa Fah'n durch d' Gegend fahrat. Des nenn i amol Integration! Die Türka wissat wenigstens, wie die Deutschlandfah'n aussieht, was mr vom Grafiker von de Tagesthema net grad behauptat kann ...

I ben jo mol gspannt, wia am Mittwoch des Spiel Deutschland gega d' Türkei ausgoht. Liebe Renter – so ihr en Traktor drhoim hend – bleibat obedengt en eurer Stub, wenn des



Spiel der Spiele am Mittwoch steigt. Net dass' euch so goht, wie dem 75-Jähriga aus Lauinga im Landkreis Dillinga, also em boirische Schwaben. Der isch

nämlich am früha Nochmittag am vergangana Samschdag mit seim Schlepper auf da Recyclinghof g'fahra. Uf em Hoimweg isch'r no en an Korso von feiernde türkische Fans g'rota. Seine Anghörige hend den Ma no gega 21 Uhr bei dr Bolezei als vermisst gmeldet. Dodoruf hend dia Beamte a Suchaktion gstartet ond den Rentner mita zwischa feiernde türkische Fans g'fonda. Türka verstandat oifach, gastfreundlich zu feira. Hoffentlich isch des am Mittwoch au no so, wenn dr Schweini die türkische Fußballer hoim schickt ... Türka dürfat sich jo koi Schwein eiverleiba. Bis näggschd Woch' Ihr
Wulf Wager